


第十四冊
卷之三十一
名宣 忠節
名宣 忠節

ル 6
437
14



盛京通志卷之三十

名宦

忠節附

士大夫策名濤時大而專城之寄小而一命之榮宜

思留遺愛於甘棠著循良於青簡矧

留都重地尤賴承流宣化之人哉昔箕子封朝鮮而遼

左化其德尚矣自漢以來勲銘鐘鼎績比龔黃者往

往而有要之功德著於一代俎豆自可千秋也今之

鎮帥卿貳與夫郡邑長吏或殫心力於締造之初或

矢公忠於全盛之日屈指而數槩不乏人固將稽勲

考績崇祀茲土者也

周

箕子

紂諸父佯狂為奴周武王釋其囚親訪焉因陳洪範武王不敢以為臣封於朝鮮至則教民禮義田蠶織作其俗化之終不相盜無門戶之閉婦人貞信不淫辟

漢

荀彘 楊僕

先是燕王盧綰以反滅燕人衛滿亡命東渡溟水降朝鮮朝鮮王準賜以圭令守西邊滿誘亡黨稍多詐

人告準言漢兵十道至求入宿衛遂還攻準走之因據朝鮮稱王雄於遼東傳子至孫右渠殺遼東都尉涉何元封三年以僕為樓船將軍與左將軍彘討之朝鮮人殺右渠以降遂定其地為樂浪臨屯元菟真番四郡

甘延壽

字君况北地郁郅人少良家子善騎射嘗超距踰羽林亭樓由是遷為郎稍遷至遼東太守車騎將軍後與陳湯建功西域進封義成侯

范明友

宣帝時拜度遼將軍將二萬騎出遼東擊烏桓破之
封平陵侯

祭彤

字次孫潁川人建武十七年任遼東大守常為士卒
鋒破走强敵二十一年鮮卑萬餘騎寇遼東彤自被
甲陷陳窮追出塞滿離高句驪之屬遂駱驛欵附鮮
卑烏桓滅貊倭韓並入朝貢自是野無風塵悉罷緣
邊屯兵彤在遼東幾三十年衣無兼副及卒烏桓鮮
卑追思無已每朝賀京師過冢仰天號泣乃去遼東
吏人為立祠祀之

耿秉

字伯初茂陵人大司馬耿國子初國上言宜置度遼
將軍左右校尉國卒顯宗思其言遂如其議置焉建
初元年拜度遼將軍視事七年恩信昭著

按明帝永平八年初
置度遼將軍屯五原郡
曼栢不在今遼陽境內

鄧鴻

禹之子肅宗時為度遼將軍永光中進兵靺鞨海禽獲
無算

耿夔

耿國次子字定公少有氣決以功封粟邑侯遷遼東

太守元興元年貊人寇郡界夔進兵至屬國故城迎擊破之高麗王宮寇畧遼東六縣夔擊斬其渠帥遷行度遼將軍事建光中與幽州刺史龐參解馬城之圍

梁 謹

字伯威北地弋居人永初三年冬南單于與烏桓叛詔謹行度遼將軍事四年救中郎將耿种於美稷至屬國故城與南部左將軍烏桓大人戰大破降之即拜謹度遼將軍

蔡 諷

耿耗龍瑞公孫黼附

安帝時為遼東太守元初五年高句驪王宮與濊貊寇元菟攻華麗城諷與元菟太守姚光擊破之夏高句驪復與鮮卑入寇攻遼隊諷追擊於新昌戰歿功曹耿耗兵曹掾龍瑞兵馬掾公孫黼以身扞諷俱歿於陣

陳 禪

字紀山巴郡人永寧元年轉元菟侯城障尉拜遼東太守時北寇入邊禪不加兵但使吏卒往曉慰單于隨使還郡禪於學行禮為說道義以感化之單于懷服

鄧遵

新野人禹之孫為度遼將軍發射士三千人出塞追敵大破之永寧元年烏倫其至韃等各以衆降

龐參

字仲達緱氏人舉孝廉歷遼東太守永建元年遷度遼將軍恩信大著

宋漢

京兆長安人字仲和以經行著名永建元年為度遼將軍立名節著威惠戎車載戢邊人用寧

馮緄

字鴻卿巴郡宕渠人父煥安帝時為幽州刺史疾惡致罰時元菟太守姚光亦失人和建光元年怨者詐作書譴責煥光下遼東都尉龐奮使速行刑奮即斬光收煥煥欲自殺緄疑詔文有異止之煥乃上書自訟果詐者所為徵奮抵罪而煥已歿帝愍之賜煥光錢各十萬以子為郎中緄由是知名順帝時鮮卑寇邊以緄為遼東太守曉喻降集寇皆弭散

馬續

字季則博觀羣籍兼善九章算術永和元年遷度遼將軍典邊日久深曉兵要以恩信招降萬三千口

耿 暉

字季遇耿恭之孫也順帝時為烏桓校尉破敵有功
鮮卑震怖數萬人赴遼東降及敵寇遼東屬國暉移
屯無慮城以拒之威振北方遷度遼將軍

種 暉

字景伯洛陽人仲山甫之後也舉孝廉順帝末遷遼
東太守有政聲烏桓望風率服迎拜界上桓帝擢暉
為度遼將軍暉到營所先宣恩信誠心懷撫信實分
明敵人順服暉乃去烽燧除候望邊方晏然

陳 龜

字叔珍上黨人舉孝廉歷京兆尹桓帝以龜世諳邊
俗拜度遼將軍臨行請任良牧斥姦殘除并涼租賦
帝乃更選幽并刺史自營郡太守以下多所革易下
詔為陳將軍除并涼一年租賦以賜吏民龜到職州
郡震悚鮮卑不敢近塞省息經用歲以億計

度 尚

字博平山陽湖陸人為遼東太守數月鮮卑率兵來
攻尚與戰破之邊人畏服延熹九年卒於官

公沙 穆

字文义膠東人習韓詩公羊春秋尤銳思河洛推步

之術舉孝廉累遷至遼東屬國都尉善得吏人歡心卒於官

李膺

字元禮襄城人永壽二年爲度遼將軍自膺到邊寇盜望風懼服先所掠男女悉送還塞下自是之後聲振遠域

趙苞

字威豪甘陵東武城人舉孝廉爲遼西太守抗厲威嚴名振邊俗遣使迎母及妻子道經柳城值鮮卑入塞劫苞母以擊郡苞督兵禦之賊出母示苞苞悲號

謂母曰爲子無狀本欲以微祿養不圖爲母作禍今不得顧私恩毀忠節母遙謂曰人各有命何得相顧以虧忠義卽進戰賊悉摧破母妻皆爲所害事平封苞爲郟侯苞歸葬訖謂鄉人曰食祿而避難非忠也殺母以全義非孝也如是何面目立於天下遂嘔血死

張奐

字然明敦煌酒泉人桓帝時舉賢良對策第一遷度遼將軍以計破叛渠降其衆凡二十萬口

段熲

字紀明姑臧人舉孝廉遷遼東屬國都尉時鮮卑犯塞頰率所領馳擊大破之在邊十餘年與將士同甘苦未嘗一日蓐寢故所向有功

皇甫規

字威明安定朝那人舉賢良方正梁冀以規對策刺已置以下第冀誅後爲中郎將拜度遼將軍至營數月上書薦張奐以自代曰臣聞人無常俗而政有治亂兵無強弱而將有能否伏見中郎將張奐才畧兼優宜正元帥以從衆望若猶謂愚臣宜充軍事者願乞冗官以爲奐副朝廷從之以奐代爲度遼將軍規

中郎將及奐遷大司農規復代爲度遼將軍在事數歲北邊咸服

橋元

字公祖睢陽人桓帝末鮮卑高句驪並叛四府舉元爲度遼將軍假黃鉞元至鎮休兵養士然後督諸將討擊悉破散之在職三年邊陲安靜

公孫域

桓帝時爲元菟太守永康元年夫餘王夫台將二萬餘人寇元菟域擊破之熹平三年夫餘遂奉章貢獻

劉虞

字伯安東海郟人舉孝廉時朝廷以虞威信素著拜
幽州牧時遼西邱力居遼東蘇僕延稱王中山太守
張純叛附之虞購斬純首北州乃定

耿臨

建寧元年遼西邱力居有衆五千餘落自稱王遼東
蘇僕延有衆千餘落自稱峭王右北平烏延有衆八
百餘落自稱汗魯王時耿臨爲元菟太守討降之先
是殤安之間高句驪王宮數寇遼東蔡諷討之不能
克宮死子伯固立犯遼東西安平殺帶方令建寧二
年爲臨所敗伯固降服乞屬元菟

公孫瓚

遼西令支人舉孝廉除遼東屬國長史嘗從數十騎
出塞見鮮卑數百騎瓚乃退入空亭中約從騎曰彼
衆十倍於我今不衝之則死盡矣乃自持矛兩頭施
刃馳殺數十人遂得免光和中將兵擊張純於漁陽
以功遷騎都尉封都亭侯

三國

鮮于輔

漁陽人爲劉虞從事及公孫瓚殺虞輔與齊周等共
推燕國閻柔爲烏丸司馬斬瓚所置漁陽太守袁紹

又遣虞子和及麴義將兵與輔合擊瓚瓚既破滅輔將其衆屬曹操奉王命拜左度遼將軍封亭侯文帝踐阼拜虎牙將軍

閻柔

燕人素有威信曹操與袁紹相拒官渡柔遣使詣操受事遷護烏丸校尉後從征三郡烏丸以功封關內侯文帝拜柔度遼將軍與鮮于輔皆進封縣侯位特進

牽招

字子經安平觀津人曹操將擊袁紹而柳城烏丸欲

出騎助譚操以招嘗領烏丸遣詣柳城說峭王罷其兵後從討烏丸至柳城拜護烏丸校尉文帝立拜招使持節護鮮卑校尉廣布恩信招懷降附至十餘萬落

田豫

字國讓漁陽雍奴人魏文帝時持節護烏丸校尉牽招鮮雋並護鮮卑自高柳以東滅貊以西鮮卑數十部相連結豫皆以計破散之豫清約儉素朝廷賞賜皆散之將士鮮卑素利等數來客見私遺一無所受咸高其節

司馬懿

附見綸直賈範

魏景初間公孫淵自立為燕王將軍綸直賈範苦諫

淵皆殺之魏遣司馬懿征淵圍襄平淵突圍被殺懿

入城封直與範之墓而顯擢其遺嗣

按司馬懿以征公孫淵至遼與

下隋唐征高麗諸人實未官本境不在各宦之例前志往往載之遼地之興廢亦由此可見因加增補以實

母叩儉

字仲恭河東聞喜人青龍中加度遼將軍使持節護

烏丸校尉率幽州軍至襄平屯遼隧遼西烏丸護留

等隨袁尚奔遼東者並相率降從討公孫淵定遼東

以功封安邑侯正始中高句驪數叛儉督步騎萬人

出元菟與句驪王宮大戰沸流水連破之遂登丸都

破滅其城宮攜妻子遠竄初句驪沛者名得來數諫

宮不從嘆曰立見此地將生蓬蒿遂不食死舉國賢

之儉令諸軍不壞其墓不伐其樹並釋其妻子正始

七年復討高麗及濊貊破之韓那奚等數十國皆降

王頌

字孔碩東萊人元菟太守正始六年母邱儉復征高

句驪其王宮遂奔買溝時儉遣頌追宮過沃沮千有

餘里至肅慎氏南界刻石紀功刊丸都山銘不耐城

穿山漑灌民賴其利

張邈

鉅鹿人遼東太守著自然好學論為人有遠識元康初授陽城太守未行而卒

晉

張華

字茂先范陽方城人都督幽州軍事撫納馬韓新彌諸國依山帶海去州四千餘里歷世未附者二十餘

國咸來朝獻按華督幽州宦績不在遼境前志載入各宦蓋東方之國去幽州四千餘里則

過遼東徼外矣功足綏遠故因前志詳之

賈沉

晉太康時為遼東都護先是慕容廆破扶餘其王依慮自殺子依羅求請援於東夷校尉何龕龕使沉救之廆遣其將孫丁率騎邀之於路沉力戰斬丁遂復扶餘國

慕容廆

字奕洛瓌昔高辛氏遊於海濱留少子厭次君北方邑於紫蒙之野以後遂世居遼左秦漢之際為鄰部所敗分保鮮卑山因以為號魏初曾祖莫護跋率諸部入居遼西從伐公孫淵有功拜率義王乃以慕容

爲姓自云慕二儀之德繼三光之容也父涉歸以全柳城功拜單于遷邑於遼東北生虜雄傑有大度張華一見許爲命世之器建興中拜虜昌黎遼東二國公時中原多故邊圉淪陷虜刑政修明士庶歸之於是推舉裴嶷陽耽等爲謀主破崔毖敗高句驪及素喜連木丸津立遼東郡建武中進封遼東郡公虜嘗言獄不可不慎賢不可不敬稼穡不可不急酒色便佞不可不戒著家令數千言以申其旨卒諡曰襄

裴嶷

字文冀河東聞喜人清方有幹畧累官策陽太守以

兄武守元菟求爲昌黎太守武卒嶷被徵道梗不得達乃與武子開投虜虜以嶷爲長史用其策遂破悉獨官嶷嘗獻捷於晉帝試留之以觀其意嶷辭曰慕容將軍越在海表乃心王室故遣臣萬里歸誠今若留臣必謂國家遺其僻陋孤其丹心是以微臣區區貪還反命耳帝乃遣還虜嘗謂羣僚曰裴長史名重中朝而屈於此殆天所以授孤也後出爲遼東相轉樂浪太守

韓恒

字景山灌津人永嘉之亂避地遼東依校尉崔毖

盛京通志 卷之三十一
三十一
敗爲慕容廆所得拜參軍咸和中廆僚屬宋該等建
議表請廆爲大將軍燕王之號恒駁曰晉室喪亂無
復綱紀明公忠武篤敬憂勤社稷抗節孤危之中建
功萬里之外終古勤王之義未之有也夫立功者患
信義不著不患名位不高今宜繕完甲兵以清四海
若要君以求寵爵者非爲臣之義廆不悅出爲新昌
令遷營邱太守政化大行

皇甫真

字楚季安定朝那人弱冠高才廆拜爲遼東國侍郎
皝卽位遷平州別駕時百姓勞瘁真意欲寬賦減稅
休息戶役時不能從後以敗麻秋功拜奉車都尉守
遼東營邱二郡皆有善政

封奕

字子專渤海蓊人仕廆爲軍諮祭酒軍國機要悉以
委之段遼入寇柳城奕率衆救之城垂沒奕整陣力
戰賴以得全

慕容皝

字元貞廆第三子龍顏版齒尚經學多材藝尤善天
文建武初封望平侯率衆征討累有功成帝拜皝大
單于遼東公咸康三年遂稱王

慕容翰

字元邕，廆之庶長子，性雄豪，多權畧，爰背工射，永嘉三年，遼東太守龐本以私憾殺東夷校尉李臻，遼東鮮卑素喜連木丸津等因欲爲亂，翰言於廆曰：「求諸侯莫如勤王。」今連津拔扈托爲龐本報仇，內實幸災爲寇，遼東傾沒，中原離亂，勤王仗義，今其時也。宜召義兵，問連津之罪，興復遼東，並吞二部，以立霸王之基。廆從之。以翰爲前鋒，率騎東擊連津，破斬之。立遼東郡，而歸晉。廆復遣翰攻段疾陸眷，遂鎮徒河、壁青山，及鎮遼東，撫安民夷，甚有威惠。

陽 駘

北平無終人，清直端敏，仕爲遼西太守。慕容翰攻段氏於陽樂，獲駘，廆甚敬禮，用爲謀主。官東夷校尉。

慕容恪

字元恭，駘之第四子。從駘征伐，臨機多奇策。使鎮遼東，甚有威惠。高句麗憚之，不敢爲寇。及伐夫餘，身當矢石，推鋒而進，所嚮輒潰。

劉 佩

河間人。元菟太守。咸康四年，趙石虎攻慕容皝，皝欲奔慕輿，根諫而止。劉佩曰：「今強寇在外，衆心恟懼，臣

請出擊之縱無大捷足以安衆乃將敢死數百騎出
衝趙兵所向披靡於是士氣百倍慕容興根等遂敗趙
兵境內以安

慕容農

廆之裔孫初高句驪寇遼東司馬郝景率衆救之爲
所敗遼東元菟遂沒農進伐高句驪克之復遼東元
菟二郡及慕容垂立國封農爲遼西王在龍城五年
庶政修舉後召還以慕容隆代之隆因農舊規修而
廣之遼碣遂安

南北朝

高寶寧

北齊人武平末爲營州刺史鎮黃龍夷夏重其威信
周師將至鄴寶寧率驍銳并契丹靺鞨萬餘騎將赴
救至北平聞鄴都不守便歸營州周遣使招慰寶寧
却其勅書還據黃龍竟不臣周前志載南北朝張志
和爲宜州刺史有惠
政按定和仕於隋隋時
遼東無宜州今刪去

隋

韋冲

京北杜陵人文帝時封義豐侯遷營州總管冲寬厚
得衆撫靺鞨契丹皆能致其死力奚霫朝貢相續高

麗主元率靺鞨萬餘騎寇遼西冲擊走之

麥鐵杖

錢士雄孟金父附

始興人大業八年征高麗賊阻遼水拒守鐵杖將度遼謂其三子曰吾荷國厚恩今乃吾報命之秋唯誠與孝汝其勉之時造浮橋於遼水西岸既成引橋趨東岸橋短去岸丈餘賊大至鐵杖奮躍登岸與錢士雄孟金父等皆力戰死詔贈鐵杖宿公諡武烈

衛元

字文昇洛陽人大業八年檢校右禦衛大將軍帥師出增地道諸軍多不利元獨全衆而還

楊義臣

代人遼東之役以軍將指肅慎道至鴨綠水與乙支文德戰每爲先鋒一日七捷

王仁恭

字元實天水上邽人征遼東時爲將軍及班師仁恭爲殿遇賊敗之明年復以軍將指扶餘道進至新城破其軍進光祿大夫

沈光

字總持吳興人少貧賤善緣竿直上號肉飛仙大業九年徵驍果伐遼東同類數萬人皆出其下時王仁

恭破高麗兵進攻新城衝梯竿十五丈光升其端臨
城殺傷十數人高麗競擊而墜未及地適遇竿有垂
緝接而復上帝望見壯之卽拜朝散大夫後殉江都
之難

段文振

北海期原人煬帝時授左候衛大將軍出南蘓道在
軍疾篤遺表以爲遼東小醜口陳降欵心懷背叛勿
得便受水潦方降不可淹遲願嚴勒諸軍星馳速發
平壤孤城可拔則餘城自尅如不時定脫遇秋霖兵
糧旣竭強敵在前靺鞨出後深爲艱弊非上策也帝

省表悲嘆久之贈北平公諡曰襄

來護兒

字崇善江都人以平壤道行軍總管率樓船指滄海
入自泚水去平壤六十里與高麗遇進擊大破之追
奔至城下毀其郭會宇文述兵敗乃旋大業十年又
帥師渡海至卑奢城高麗舉國迎戰護兒擊破之高
元震懼執叛臣斛斯政詣遼東城下請降帝許之遂
旋師

李景

字道興天水休官人大業七年從征高麗攻武厲城

破之九年復出遼東師旋追兵大至景擊走之進爵滑國公十二年煬帝令景營遼東戰具於北平粟帛山積景無所私江都之變盜賊蜂起遼西太守鄧暹救景遂歸柳城將還幽州遇賊見害契丹靺鞨素感其恩聞之莫不流涕

唐

張儉

字帥約京兆新豐人以功累遷營州都督兼護東夷校尉營州部與契丹奚靺鞨諸部切畛高麗引衆入寇儉擊破之太宗征遼儉率兵渡遼水趣建安城破高麗兵封皖城郡公後改東夷校尉官爲都護府卽以儉爲都護

李道宗

字承範太祖曾孫貞觀中高麗蓋蘇文弑其王高建武而立建武之姪藏自爲莫離支阻兵不服太宗征之以道宗爲遼東道副大總管道宗請將百騎先覘形勢帝問往返幾日對曰往返兼旬周覽十日遂秣馬束兵旁南山直入遼東城南相險易度營陣便處將還高麗兵斷其後更走間道如期謁見詔與李勣爲前鋒拔蓋牟城會救至道宗等所將裁四千虜十

倍軍中議保險以須道宗曰吾屬爲前軍當清道迎
乘輿尙何待遂選壯騎數十突進賊營左右出入勦
合擊大破之

長孫无忌

字輔機洛陽人從太宗征高麗攻安市敵兵十五萬
拒戰无忌以萬人衝其後撤橋梁斷敵歸路敵衆遂
降

李勣

字懋公離狐人貞觀十八年以李勣馬周爲遼東道
行軍大總管率十六總管兵以伐高麗十九年勣趨

遼東自通定濟遼水拔葢牟遼東白崖等城從戰歷
蹕山功最多二十一年復與牛進達伐高麗勣克南
蘓木底進達克石城乾封初仍充遼東道行臺大總
管擊高麗下十七城總章元年拔扶餘南蘓木底蒼
巖城進圍平壤執高藏男建等裂其地州縣之

張亮

滎陽人平壤道行軍大總管與副總管左難當自萊
州泛海襲拔沙卑城至建安營壁未立賊兵奄至亮
踞胡床直視於是副將張金樹鳴鼓勒兵奮擊破之

前志所載今按新唐書言亮不知所爲踞
胡牀直視無所言則破賊者張金樹矣

郝處俊

安陸人貞觀進士副李勣討高麗師入境未及陣賊遽至舉軍危駭處俊方據胡床餐乾糒密簡精銳擊卻之

王君愕

洺州邯鄲人從征遼領左屯營兵與高麗戰駐蹕山

駐蹕山在安市城東南

薛仁貴

絳州龍門人名禮以字行躬耕時將改葬其先妻柳

曰天子自征遼東求猛將君盍圖功名以自顯富貴還鄉葬未晚仁貴乃應募至安地會郎將劉君印被圍仁貴馳救斬賊將首繫馬鞍由是知名王師攻安市高麗率衆拒戰仁貴白衣持戟鍵兩弓呼而馳所向披靡帝遣使馳問白衣者誰曰薛仁貴帝召見喜得彪將授游擊將軍顯慶二年詔副程名振伐高麗破之於貴端城四年破温沙多門於橫山及戰石城有善射者多殺官軍仁貴單騎突擊賊弓矢俱廢遂生擒之乾封初援泉男生大破高麗進拔扶餘威振遼海高麗平進檢校安東都護封平陽郡公移治新

城撫孤存老檢制盜賊隨材任職褒崇節義高麗士
衆皆欣然忘亡

薛萬徹

咸陽人貞觀二十二年以青邱道行軍總管自海道
征高麗次鴨綠水以奇兵襲大行城斬其渠帥遂傳
泊灼擊走援兵拔其城

契苾何力

鐵勒人太宗征高麗烏骨城遣兵爲白巖聲援何力
挺身陷陣槩中腰尙輦奉御薛萬備單騎往救出何
力於萬衆之中帝親傅瘡藥何力益憤束瘡再戰成
旣拔得刺何力者高突勃驪使自殺之辭曰彼爲主
冒白刃以刺臣義士也犬馬猶報其養况人乎捨之
龍朔初拜遼東道行軍總管擊高麗進兵鴨綠餘衆
多降乾封初詔以何力爲遼東道行軍大總管安撫
大使副李勣同趨高麗何力大破高麗於南蘓進拔
扶餘先引兵趨平壤勣軍繼之高麗平

程名振

洛州平恩人破劉黑闥有功拜營州長史封東平郡
王從征高麗拜平壤道行軍總管攻沙卑城破獨山
陣皆以少擊衆永徽六年以營州都督兼東夷都護

擊高麗於貴端水焚其新城顯慶三年與仁貴攻拔赤烽鎮破高麗大將豆方婁龍朔三年與蘓定方等復伐高麗敗之

龐同善

乾封初以遼東道行軍總管援泉男生及高麗戰敗之男生率師來會詔拜同善特進遼東大都督封元菟郡公

高 倂

永徽中爲北道安撫使以功歷安東都護乾封初進營州都督爲遼東道行軍總管討高麗咸亨初以東州道行軍總管破高麗於泉山總章二年高麗鉗牟岑叛復以倂爲東州行軍總管與將軍李謹行討之鉗牟岑走新羅徙都護府治遼東州破叛兵於安市又敗之於泉山

蘓定方

名烈以字行冀州武邑人永徽六年爲遼東道行軍大總管伐高麗敗之於貴端水龍朔元年復破之於浪江

龐孝泰

龍朔元年爲沃沮道行軍總管伐高麗二年及高麗

唐東通志 卷之三十一
戰於蛇水死之

張元福

元城人從征遼東有功累遷利州刺史

劉仁軌

蔚氏人麟德初爲帶方州刺史破百濟立唐社稷頒
正朔及廟諱然後修屯田儲糗糧訓士卒以圖高麗
總章元年爲遼東道副大總管兼安撫大使與李勣
討高麗平之

泉男生

字元德高麗蓋蘇支子爲弟男建男產等所逼遂率
衆與契丹靺鞨兵內附明年入朝遷大都督遼東郡
公詔還軍與李勣攻平壤擒高藏進下國公奉詔安
撫遼東並置州縣招流亡平斂賦罷力役民悅其寬
卒謚曰襄勒碑著功

許欽寂

安陸人萬歲通天元年契丹入寇詔爲討擊使戰崇
州敗被禽時契丹方圍安東脅令說屬城未下者欽
寂呼安東都護裴元理曰賊朝夕當滅幸謹守遂遇
害贈蘄州刺史謚曰忠

王元志

天寶時爲安東都護安祿山反與營州侯希逸共斬其親將徐歸道詔拜元志平盧節度使兼御史大夫
蘓源明奏德宗有云御史大夫王元志壓巫閭臨幽都其爲時倚重如此

全客奴

懷州武涉人開元中室韋首領段普洛數苦邊節度使薛楚玉使客奴單騎襲之斬其首以歸拜左驍衛將軍數戰有功安祿山反平盧節度副使呂知誨降賊害安東副都護馬靈謦客奴與諸將殺知誨遣使與安東將王元志相聞天寶十五載以客奴爲柳城郡太守賜名正臣以元志爲安東副大都護正臣遣使道海至平原與太守顏真卿相結且請出師未至而平原失乃還

遼

蕭阿古只

字撒本驍勇善射天贊四年攻渤海破扶餘城獨將騎兵五百敗老相軍三萬渤海已降郡縣復叛阿古只與康默記討之會鴨綠府游騎七千來援阿古只率麾下直犯其鋒克之遂進破回跋城以病卒

盛京通志卷之三十一

盛京通志卷之三十一

名宦

忠節附

遼

耶律羽之

字寅底晒幼豪爽不羣長通諸部語太祖經營之初
 多預軍謀天顯元年渤海平立耶律倍為東丹王以
 羽之為中臺省右次相莅事勤恪威信並行太宗即
 位上言渤海昔畏南朝阻險自衛居忽汗城先帝克
 之已歸版圖但去上京遼邈恐為後患梁水之地乃
 其故鄉又有木鐵鹽魚之饒宜徙居之選其徒以翼

吾左突厥党項室韋夾輔吾右可以坐制南邦混一
天下帝嘉納之詔徙東丹國民於梁水時稱其善守
耶律隆先

字團隱倍之子博學能詩景宗卽位封平王兼政事
令留守東京薄賦稅省刑獄恤鰥寡數薦賢能之士
後與統軍耶律室魯討高麗有功卒葬醫巫閭山之
道隱谷有閬苑集行於世

何魯不

字斜寧耶律吼之子以平察割功授昭德軍節度使
黃龍府軍將燕頗殺守臣以叛何魯討之破賊於鴨

綠江

蕭韓家奴

字休堅涅刺部人少好學博覽經史重熙四年官天
成軍節度使徙彰愍宮使帝與語才之命爲詩友屢
有獻納後拜來州歸德軍節度使以善治聞

韓德凝

安次人謙遜廉謹保寧中任崇義軍節度使移鎮廣
德秩滿部民請留從之

李壽英

統和中爲嚴州刺史有惠政部民請留從之

蕭排押

字韓隱統和十五年加政事令遷東京留守開泰五年封東平王排押爲政寬裕而善斷諸部畏愛民以殷富

蕭柳

字徒門多智能文膂力過人統和十七年南伐有功其父排押留守東京奏柳爲四軍兵馬都指揮使明年爲北女直詳穩政濟寬猛部民畏愛遷東路統軍使秩滿百姓願留復任許之後致仕卒耶律觀音奴集柳所著詩千篇目曰歲寒集

蕭孝穆

小字胡獨堇太平九年大延琳叛於東京以孝穆爲都統致討孝穆去城四面各五里許築城堡圍之遂擒延琳以功授東京留守治遼陽爲政寬簡撫納流徙民甚安之

蕭蒲奴

字留隱開泰間選充護衛大延琳叛據東京蒲奴爲都監將右翼軍與賊戰蒲水中又敗賊於手山延琳走入城大軍圍東京蒲奴討諸叛邑平吼山賊遂擒延琳以功加侍中

李可舉

開泰初任中京留守推官治獄平允詔超遷之

韓制心

幽州安次人開泰中拜上京留守太平中歷中京留守數以不曲法不虐民不愛官自箴歲若不登奏免租賦民若被兵奏發廩賑寵居貴戚而不驕屢徙王位而不矜卒之日部民若哀父母

耶律古昱

字磨魯堇有膂力工馳射開泰間討烏古敵烈部有功詔鎮撫西北部教以種樹畜牧不數年民多富實

中京盜起命古昱爲巡邏使悉擒之從征渤海有破敵功累遷御史中丞徙鎮歸德二十一年改天成軍節度使

劉晨言

中京留守推官治獄明允詔超遷之

耶律蒲古

字提隱統和初從伐高麗有功累遷上京客省副使太平二年城鴨綠江蒲古守之有治蹟五年遷東京統軍使蒞政嚴明諸部懾服大延琳叛以書結保州夏行美執其人送蒲古蒲古入據保州延琳氣沮東

京平以功拜惕隱

張傑

瀋州節度副使時東京舍利軍詳穩大延琳叛自號興遼國建元天慶傑聲言欲降以緩其師急修守禦之具延琳攻之不克詔以傑爲瀋州節度使

韓紹勛

幽州安次人任東京戶部使太平九年大延琳叛被執不屈賊鋸殺之

蕭阿剌

字阿里懶孝穆子清寧中與蕭革同掌國政革諂諛

不法阿剌爭之不得告歸除東京留守阿剌性忠果曉世務有經濟才因行瑟瑟禮入朝陳時政得失蕭革以事中傷見殺

劉伸

字濟時宛平人重熙中權中京副留守詔徙富民實春泰二州伸奏罷之歷崇義軍節度使政務簡靜民用不擾致烏鵲同巢之異拜叅知政事遷上京留守耶律敵烈

字撒懶吼五世孫寬厚好學工文詞清寧中爲北面林牙承旨及重元作亂敵烈赴援力戰授臨海軍節

度使咸雍五年累遷長寧宮使檢括戶部司乾州錢帛逋負立出納經畫法公私便之大康中遷上京留守改塌母城節度使致仕

王棠

涿州新城人鄉貢禮部廷試皆第一累遷東京戶部使大康二年遼東饑民多死請賑恤從之

蕭兀納

字特免六院部人天祚在潛邸兀納數以直言忤旨及卽位出爲歸海軍節度使上言自蕭海里亡入女直彼有輕朝廷心宜益兵以備不虞不聽天慶元年

知黃龍府改東北路統軍使復上言臣治與女直接境觀其所爲志實不小宜先其未發圖之又不可聽及金兵起人以爲有先見之明移敵寨

蕭兀納之孫天慶初金兵來侵戰於寧江州移敵寨死之

韓慶民

任宜州節度使金闍母下宜州拔槎枒山慶民死之其妻亦自殺

金

幹魯

景祖孫韓國公劾者第二子康宗初高麗築九城於曷懶甸時幹賽母疾病魯代將其兵數月亦對築九城與高麗抗出戰入守幹賽用之卒城高麗收國二年詔魯帥諸軍伐高永昌大敗之東京州縣盡降以幹魯為南路都統迭勃極烈燭俛水部實里古達殺酬幹僕忽得幹魯討之誅其首惡撫定餘衆後破西京敗夏人取遼皆有功及宗幹伐宋幹魯行西南西北兩路都統事天會五年卒皇統五年追封鄭王天德二年配享太祖廟庭

按金史幹魯完顏掃合完顏阿里不魯納坦謀嘉與屯襄

唐括德溫高松吾札忽徒單繹移刺福僧皆當入人物而前志已入名宦今雖不復更訂而增補事實與志人物者等謂之金人物可謂之金名宦亦可若他省志地界清晰有彼府州縣人物而此地入名宦者入名宦者必兩存之矣

赤蓋暉

字仲明家來州體貌雄偉慷慨有志畧從闍母定興中府義錦等州被張覺及再伐宋功皆最留撫河間時居民被掠老幼存者亡幾暉下令軍中聽贖還之及攻降濟州暉約束軍士秋毫無犯連敗宋軍遂至餘杭及還載資治通鑑板以歸累功遷歸德軍節度使宗州舊無學暉為營建學舍勸督生徒肄業者復

其身人競趨之屬縣民家奴王夔者嘗業進士暉以錢五十萬贖之使卒其業夔後至顯官天德中封暉河南郡王拜平章政事卒諡武唐來州先名宗州在今寧遠州境

伯德特離補

奚五王族人也初授濱州刺史廉入優等累遷崇義軍節度使特離補爲人孝謹爲政簡靜不積財貨常曰俸祿已足養廉衣食之外何用蓄積凡調官行李止車一乘婢僕數人而已

唐括德溫

上京率河人善射皇統元年從宗望收平州遇敵兵敗之遷龍虎衛上將軍從宗弼南征突戰有功遷定遠大將軍臨海軍節度使大定初封道國公

移刺按答

遼橫帳人累官東京副留守參知政事兵部侍郎徙西北西南兩路舊設堡戍迫近內地者於極邊安置仍與秦州臨潢邊堡相接除武定軍節度使以招徠邊部功遷東北路招討使臨潢尹按答騎射絕倫善相馬嘗閱馬於市遇羸瘦者與之善價他日試之果良

移刺溫

遼橫帳人以功歷崇義節度使移臨海軍州治近水
秋雨水潦暴至城下城頗決百姓惶駭不知所為溫
督役繕完之身臨不測無所避僚屬或止溫溫曰為
政疵癘水泛溢為災守臣之罪當以身為百姓謝死
不恨後移鎮武定旱且蝗溫刺指血瀝酒中禱而酌
之既而雨霑足有羣鴉啄蝗且盡人以為至誠之感

李晏

字致美澤州高平人皇統六年進士仕遼陽推官有
政績歷遷御史中丞初錦州龍宮寺遼主撥賜口民
俾輸稅於寺歲久皆以為奴有欲訴者害之島中晏
乃具奏在律僧不殺生况人命乎遼以良民為二稅
此不可法今幸遇聖朝乞盡釋為良世宗納其言獲
免者六百餘人

高昌福

宛平人登進士歷官同知東京留守以治最累遷工
部尚書彰德軍節度使

紇石烈良弼

本名婁室回怕川人也天會中選女直學生送京師
希尹一見許為國器年十四為北京教授學徒常二

百人時人爲之語曰前有谷神後有婁室天德中拜尚書右丞海陵伐宋良弼諫不聽詔良弼與將軍徒單貞撫定上京遼右世宗卽位窩斡敗於陷泉入奚中詔良弼往北京招撫奚契丹封宋國公拜左丞相兼修國史良弼爲相既久練達朝政上所詢訪盡誠開奏薦舉人材常若不及號爲賢相配享世宗廟庭移刺子敬

字同文遼五院人與修遼史際同知遼州事舊本廳自有占地歲入數百貫子敬曰已有公田何爲更取民田竟不取及爲興中尹子敬女自懿州來省謁中途遇盜剽行李且盡旣而還之曰我輩初不知爲府尹家也尹有德於民尚忍侵犯耶後子敬歷咸平廣寧尹致仕卒時家無餘財

馬惠廸

字吉甫鄆陰人擢進士初調昌邑令察廉第一歷西京留守判官以治最擢同知崇義軍節度使廉能稱職遷御史中丞拜參知政事

劉煥

字德文中山人宋木兵起乏食煥尚幼煮糠供母而自飲其清者稍長就學寒擁糞火讀書不怠登天德

進士調中都市令以廉遷北京警巡使捕二惡少杖之庭中戒之曰孝弟敬慎則爲君子暴戾隱賊則爲小人自今以後毋徂故習國有明罰吾不得私也由是衆皆畏服無敢犯者召爲監察御史父老數百人或卧車下或挽靴燈曰我欲留使君期年不可得也大定中同知北京留守事時世宗幸上京所過州郡大發民夫治橋梁馳道以期恩賞煥所部惟平治端好而已上嘉其意遷遼東路轉運使卒

吾札忽

安帝六代孫婆盧火之子也善騎射大定初除咸平尹從征伐有功改呼里改節度使卒吾札忽性聰敏有才智善用軍常出敵之不意以寡敵衆所往輒克營中號爲鷓軍云

納坦謀嘉

上京路平塔懶猛安人習策論進士大定二十六年補上京提刑書史以廉能著稱承安五年特賜同進士出身調東京教授湯池主簿貞祐初遷翰林待制充元帥府經歷時中都危急宣宗議遷都謀嘉諫不聽興定初上書諫伐宋降潁州刺史有守禦功召爲翰林侍講學士同修國史

高松

澄州析木人弱冠從軍爲蒲輦多力善載從宗弼破
汴京及和尚原累官咸平府總管判官世宗卽位充
管押東京路渤海萬戶兵部尚書可喜謀反前同知
延安尹李老僧欲得高松共事遂往見松以言挑之
曰君有功舊人至今不得大官何也松曰我一縣令
每念聖恩累世不能報敢他望乎老僧遂不敢言可
喜等事遂敗後松從征窩斡以功遷咸平少尹官至
崇義軍節度使

盧孝儉

宣德州人登進士官太原少尹大定中用廉進官二
階遷同知廣寧尹廣寧大饑民多流亡孝儉設法賑
濟全活甚衆

完顏掃合

一名齊穆宗曾孫也大定中同知復州軍事合廝罕
地方七百餘里舊因圍獵禁民樵捕齊言其地肥衍
令賦民開種則公私有益請弛禁以居民田收甚利
因名其地曰合廝罕猛安及爲磁州刺史治以寬簡
未嘗留獄同知益都府有惠愛郡人爲之立碑明昌
六年轉利涉軍節度使召見勞慰有加齊明法識治

體所至有聲內族中與丞相丞暉並稱官至上京留守致仕

承暉

字維明好學淹貫經史遷東京咸平路提刑副使同知上京留守豪猾屏息遷臨海軍節度使歷利涉遼海軍遷北京路提刑歷知咸平臨潢府爲北京留守李東陽素貴承暉自非公事不與交一言卒爲名臣死於中都之難贈尚書令廣平郡王諡忠肅
擣盪溫敦兀帶

阿補斯水人通書史工爲詩世宗卽位授咸平及會寧尹爲北邊行軍都統時窩斡初定人心未安兀帶爲治寬簡多備禦謹斥堠邊境以寧改北京留守以廉察舉兀帶所在有能名無私過入拜參知政事

王賁

字文孺其先自臨潢移貫宛平賁性孝友勤敏好學第進士調復州軍事判官廉靜有守不尚奔競政府推薦累遷南京路按察使

李完

字全道朔州馬邑人經童出身復登詞賦進士遷同知廣寧府初遼濱人崔元入城飲酒不歸後得屍水

中有司執同飲者訊之皆誣服提刑司疑其寃以獄
畀完完廉得其賊乃舟師也遂免同飲者改北京臨
潢路提刑副使

張行信

字信甫純正真率不事修飾擢進士官銅山令明昌
元年以廉擢授監察御史兩登相位言無隱避及卒
皆曰正人亡矣

楊雲翼

字之美天資穎異初學語輒畫地作字日誦數千言
且精歷數明昌中登進士累官上京東京等路按察
使司事雲翼天性雅重自律甚嚴待人則寬國家之
事知無不言嘗因事召見章宗咨以世務深重之大
安元年翰林承旨張行簡薦其才召授提點司天台
遷翰林侍講兼修國史

蔡珪

字正甫真定人登進士除澄州軍事判官珪既該博
有補正水經五篇合沈約蕭子顯魏收宋齊北魏志
作南北史志三十卷續金石遺文跋十卷晉陽志十
二卷文集五十五卷傳於世按前志誤以珪入人物
本欲刪去以嘗爲澄州
判官猶可移入
名宦故存之

趙文昌

遼東路鹽運使好古博學議論持正

馮璧

字叔獻真定縣人承安二年進士調遼濱主簿縣有和糴粟未給價者十萬斛散貯民居以富人掌之有腐敗則責償於民璧白漕司罷之民大悅累遷同知集慶軍節度使

瑤里孛迭

北京路陀羅山謀克人以軍功擢海濱令廉能稱職明昌六年北邊有警圍慶州孛迭時爲東北路招討

使率兵往救敵解去六羣牧人叛孛迭爲都統領步騎人至懿州奮擊大敗之承安二年糺軍千餘出沒剽掠錦懿間孛迭追敗之復獲所掠悉還本戶五年知廣寧府改東北路招討使捍邊有功三遷爲崇義軍節度使孛迭勇決善戰自幼以軍功顯任兵鎮十餘年所向克捷

梁持勝 裴滿賽不 韓公恕

字德甫稷山人多力善射泰和六年進士復中宏詞累官太常博士遷咸平路宣撫使初宣撫使蒲鮮萬奴有異志欲棄咸平持勝沮萬奴怒杖之上京

行省太平與萬奴通謀焚毀上京奪元帥承充軍持
勝與提控咸平治中裴滿賽不萬戶韓公恕約殺人
平復推承充行省事事泄被害贈持勝忠順大夫韓
州刺史贈賽不鎮國上將軍顯德軍刺史公恕明威
將軍順州刺史

奧屯襄

上京路人襲猛安丞相襄舉通練邊事授崇義軍節
度副使遷平南盪江將軍有功陞河南路副統軍昌
武軍節度使宣宗卽位擢遼東路宣撫副使兼同知
上京留守事

徒單繹

上京按出虎達阿人尚熙宗女瀋國公主歷宣德泰
安淄川刺史改同知廣寧府事歷遷棣州防禦使所
至以政績聞升臨海軍節度使

移刺福僧

子銅和尚附

東北路烏連苦河猛安人以蔭補吏累功遷順義軍
節度副使部內世襲猛安木吞掠民婦女藏窟室無
敢發其罪者福僧請於節度使率衆入索得婦女四
十三人木吞抵罪大安初遷沃州刺史同知興中府
事福僧繕城浚濠百姓頗怨頃之兵果至攻其北城

福僧戰於北使備西薄暮賊果攻其西以有備乃解去尋改廣寧崇慶元年秋福僧被牒如鄰郡敵兵薄城其子銅和尚率家奴拒戰廣寧賴之以完福僧還悉放奴爲良終不言子之功未幾充遼東宣撫副使歲大饑福僧出沿海倉粟先賑而後奏優詔獎諭至寧元年進鞏王傅兼戶部郎中胡沙虎作亂福僧稱疾不出宣宗封胡沙虎澤王百官皆賀福僧獨不往出福僧壽州防禦遷山東西路轉運使致仕

完顏阿里不孫

烏懶路泰申必刺猛安人明昌中登第貞祐初官御史中丞遼東路行尚書省事興定元年叅知政事行尚書元帥府於婆速路阿里不孫寬厚愛人敏於吏事能治劇要特伯德胡土有異志以兵戕殺阿里不孫詔贈阿里不孫平章政事芮國公

紇石烈德

字廣之真定路山春猛安人明昌進士貞祐二年官肇州武興軍節度使宣撫司署都提控時肇州圍急食且盡有糧三百船在鴨子河去州五里不能至德乃浚壕增陴築渠道濠水屬之河鑿陷馬笄伏甲其旁以拒守一日兵數接士殊死戰渠成船至城下兵

食足圍乃解改遼東路轉運使軍民遮道挽留乘夜
乃得去蒲鮮萬奴逼上京德與部將劉子元戰却之

遷東京留守

紇石烈桓端

乙亥年蒲鮮萬奴據遼東僭稱天王國號大亨改元天泰丙子冬降復叛僭稱

東夏

西南路猛安人貞祐二年為宣差副提控同知婆速
路兵馬都總管行府事三年蒲鮮萬奴取咸平東京
瀋澄諸州多從之萬奴侵婆速近境桓端率兵擊却
之九月萬奴眾九千人出宜風及湯池桓端率兵與
戰其眾潰去四年桓端遣王汝弼由海道奏事宣宗

嘉其功遷遼海軍節度使

兀里卜

金末為興中府同知蒙古兵起木華黎遣人招降兀
里卜斬其使謀拒守為其下所殺

答魯 楊趙奴

金末時蒙古兵畧地高州拔惠和金源和眾龍山利
建富庶等十五城降其北京留守銀答忽進攻北京
傍近諸寨樓子崖等二十餘寨皆降惟西乾河答魯
五指山楊趙奴固守不下大小百餘戰趙奴死之答
魯敗走復聚眾攻龍山以槊刺烏野兒中胸復為史

天祥所敗答魯力戰死之

傅霖

玉田人第進士累官至崇義軍節度副使行部臨潢
歿於兵

元

木華黎

蒙古人雄勇有謀與博爾木博兒赤老溫俱以忠勇
事其主號爲撥里班曲律猶云四傑也先是張鯨據
金錦州自稱臨海王附於元元以鯨總北京十提領
兵從奪忽蘭撒里必南征鯨懷反側木華黎覺之令

蕭也先監其軍至平州鯨稱疾逗遛不進也先執殺
鯨鯨弟致憤其兄被害乃殺長史據錦州自稱瀛王
改元興隆畧平灤瑞利義懿廣寧等州下之木華黎
帥軍致討州郡復降致依險爲阻木華黎欲設奇取
之乃遣權帥吾也而等別攻溜石山堡且諭之曰汝
等急攻賊必往援我出其不意斷賊歸路可一戰擒
也又令蒙古不花別屯永德縣東伺之致聞溜石被
圍果以兵救蒙古不花遣騎扼其歸路且馳報木華
黎中夜引軍急馳比曙抵神水與致遇而蒙古不花
兵亦會前後夾擊致遂奔潰拔開義縣進圍錦州致

閉門拒守月餘其下縛之降木華黎殺致遼西遂平木華黎進太師封國王卒謚忠武

史天祥

太祖伐金署天祥都鎮撫平興州趙守玉敗金將答魯進克興中府從木華黎平張致又會契丹漢軍擒關肅復和州破尖山香爐紅螺塔山大蟲駱駝團崖諸寨拔蓋金蘇復等州遷鎮國上將軍利州刺史丁丑夏山賊祁和尚援武平討平之又滅重兒盜於興州之車河

吾也而

冊領氏太祖五年吾也而與折不那演克金東京有功九年從木華黎取北京先驅下之授北京總管都元帥留撫其人綏懷有方自京以南相繼降附趙守玉據興州吾也而討平之張致以錦州叛又攻破之太宗元年與撒里火兒赤征下遼東三年又與撒里答征高麗下十餘城高麗請和送質帝大悅俾吾也而充北京東京廣寧蓋州平州泰州開元府北路征行兵馬都元帥

耶律留哥

契丹人初仕金爲北邊千戶元太祖起兵朔方金人

疑遼遺民有他志令遼民一戶以二女直戶防之留哥不自安遁至隆安韓州與耶的合兵十餘萬遂稱遼王改元元統盡有遼東諸郡遂都咸平後與子薛闡奉金幣銀牌見帝帝大悅賜金虎符仍命為遼土居廣寧府卒年五十六妻姚里氏入奏會帝征西域承制以姚里氏佩虎符領其眾七年

懷閩公

西域阿魯渾人為瑞州達魯花赤民感其惠立德政

碑按元太祖初置達魯花赤監治郡縣達魯花赤者猶言掌印官也而寧遠州舊志入遼名宦誤矣

胡秉彝

霸州人累官錦州知州先是州民不業耕織秉彝乃自編伊尹武侯耕田遺制及苗司農栽桑圖徧行都部復於城東築濟民園種桑百餘畦聽民移植雖蔬菜菓蒹栽植有方小民效法衣食饒足至元中省部馳檄東方和糴奉行不善秉彝令蓄積者聽自輸官民輦運赴倉侵漁遂息

亦力撒合

唐兀烏密氏至元二十一年為北京宣慰使知諸王乃顏鎮遼東有異志密請備之二十三年立遼陽行省以亦力撒合為參知政事乃顏反帝自將征之亦

力撒合掌運糧儲東方帝嘉其先見且餉糧有勞加左丞

撒吉思

回鶻人世祖時授北京宣撫鋤奸抑強遼東以寧會高麗有異志帝遣使究治則委罪於其臣洪察忽械送京師道遼東撒吉思訪知洪察忽以直諫遷意卽奏疏爲直其事帝命釋之

羅璧

字仲玉鎮江人至元十九年用丞相伯顏言初通海運璧爲運糧萬戶進懷遠大將軍管海運二十四年乃顏叛璧以漕舟至遼陽浮海抵錦州小凌河至廣寧十寨諸軍賴以濟加昭勇大將軍

趙璧

字寶仁雲中懷仁人世祖卽位拜中書平章政事改中書左丞高麗主王植爲林衍所逐命同國主頭輦哥行東京等路中書省事聚兵平壤璧議曰高麗遷居江華島內恃其險故權臣無所畏忌擅逐其主今衍已死王實無罪若遣兵護歸復國於古京可以安兵息民策之上也帝從之時同行者分高麗美人璧得三人皆還之

王居禮

知錦州事勸農興學一以清心省事爲本值歲凶發倉賑濟全活甚衆有訟田不決者以情理開喻之其人相讓而退

土土哈

欽察人成宗時從征乃顏餘黨誅兀塔海二十五年諸王也里只爲叛王火魯哈孫所攻土土哈帥師援之還至貴烈河敗叛王哈丹盡得遼左諸部置東路

萬戶府

王伯勝

文安人爲遼陽行中書省平章政事遼陽省治懿州州弊陋民未知學伯勝始至爲增郡學弟子員選師以教之使客至無所舍皆館於民伯勝擇隙爲館廡度閑田百頃募民耕種以廩餼之歲大旱伯勝齋戒以禱禱畢卽雨人謂之平章雨延祐二年召爲大都留守遼陽民乞留不報涕泣而去泰定三年卒追封薊國公諡忠敏

洪福源

唐遣才子八人往教高麗洪其一也子孫世貴於三韓名所居曰唐城福源父大宣以都領鎮麟州福源

爲神騎都領因家焉歲丙子金源契丹九萬餘衆竄入高麗奪江東城池據之戊寅太祖命哈赤吉扎刺將兵追討大宣迎降及高麗降而復叛劫大宣以東福源遂以所招集北界之衆來歸處於遼陽瀋陽之間帝嘉其忠賜金符爲管領歸附高麗軍民長官屢有戰功以譖死後贈嘉議大夫瀋陽侯諡忠憲

兀愛

高麗王族人王綽之子也授高麗軍民總管東征左副都元帥至元二十四年乃顏叛力戰屢捷復從月魯兒那演討塔不歹朶歡大王於蒙可山那江統兵五千餘衆與八剌哈赤脫歡相拒絕流戰黑龍江箭中右臂忍傷復戰敵大敗二十五年從征哈丹禿魯討降賊黨有功加授昭武大將軍遼陽等處行中書省事屢却哈丹兵世祖嘉其功賜玉帶二十九年改東征左副都元帥府立總管高麗女直漢軍萬戶府以兀愛充職兼瀋陽安撫使高麗軍民總管

李信

字師遠朔州人力能搏虎累樹奇勲再鎮遼東人以殺虎李日之

廉希憲

字善甫畏吾人布魯海牙子也至元十一年有言國王頭輦哥鎮遼陽擾民不便者以希憲爲北京行省平章往鎮之遼東多親王使者傳令旨官吏遽聽希憲至卽爲革正有西域人自稱駙馬營於城外繫富民謬言索債希憲命急收捕其人乘馬入坐省堂希憲命捧之跪問曰法無私獄汝何敢擅繫民其人求哀國王亦爲之請乃得釋舉營夜遁長公主及國婿入朝縱獵郊原希憲欲入奏公主請以鈔償民直乃已自是貴人過者皆莫敢縱

劉敏中

字端甫章邱人大德七年遣宣撫使巡行諸道敏中出使遼東山北詔郡守令恃貴悻暴橫者一繩以法錦州雨水爲災輒發廩賑之官至翰林學士承旨生平進退不苟匡救實多有中菴集二十五卷卒封齊國公諡文簡

塔出

蒙古扎刺兒氏初授東京等路總管府達魯花赤以廉勤進開元等路宣慰東京行中書右丞遼東道宣慰使乃顏叛力戰卻之軍懿州州人羅拜道傍泣曰非公吾屬無遺種矣至遼西討擒餘黨禁止俘掠復

領軍討哈丹帝嘉其功賜珍珠上服拜遼陽等處行
中書省平章政事

洪俊奇

福源第二子襲父職管領歸附高麗軍民總管至元
六年高麗權臣林衍叛俊奇從國王頭輦哥討平之
歷遼陽尚書省右丞二十六年乃顏叛從駕親征有
功授遼陽等處行尚書省右丞以疾辭叛王哈丹等
竄入高麗遼陽騷動特起俊奇鎮遼左賜金字圓符
許便宜行事

洪君祥

福源第五子大德九年任遼陽行省右丞奏請新省
治增巡兵設儒學提舉官都鎮撫等員以興文化修
武備武宗卽位徵爲同知樞密院事歷遼陽行省平
章政事

洪萬

君祥子至元中襲職爲高麗軍民總管乃顏叛率兵
征之有功又從諸王乃蠻愛牙哈赤與叛王戰於兀
木站黑龍江等處屢敗之累功授龍虎衛上將軍遼
陽等處行中書省右丞

賀惟一

遼陽行省左丞相糴粟以給京師處置有法所致甚多民不見擾

王忱

字允中趙州寧晉人性明敏有才識授山北遼東道提刑按察司副使駙馬伯忽里數獵民田忱以法繩之憲吏耿熙言徵北京宣慰司逋負計可得鈔二十萬錠帝遣使覈實熙懼事露擅增制語有并打算大小一切諸衙門等事十二字追繫官吏至數百人忱驗知其詐熙乃服罪

張昇

字伯高其先定州人泰定二年任遼東道廉訪使屬永平大水民多捐瘠昇請發海道糧十八萬石鈔五萬緡以賑且蠲其賦民得全活者衆

朶兒只

木華黎六世孫脫脫子也文宗二年襲國王扈蹕上都詔便道至遼陽之國順帝至元四年乃蠻台以賂故得爲國王除朶兒只遼陽行省左丞相以安靖爲治民用不擾遷河南行省右丞相爲政如在遼陽時至正七年拜右丞相九年復爲國王之國遼陽

王結

字儀伯定興人性敏悟從董朴受經深於性命之學
憲副王仁見之曰公輔器也泰定中拜遼陽行省參
知政事遼東大水穀價翔湧結請於朝發粟數萬石
賑之晚遂於易著易說一卷卒封太原郡公諡文忠

郭嘉

字元禮濮陽人泰定進士會擇守令縷靖遼東授嘉
廣寧路總管兼諸奧魯勸農防禦屬盜起軍旅數興
民苦轉輸吏胥復因時爲奸嘉設法計其戶口第其
甲乙民甚便之詔團結義兵嘉募民數千教以坐作
進退號令齊賞罰信故東方諸郡錢糧之富甲兵之

精稱嘉爲最十八年寇陷上京嘉聞之躬率義兵出
禦旣而遼陽陷賊勢日熾孤城無援嘉竭家所有財
物犒義勇誓以死守頃之賊至圍城亘數十里有呼
於城下者曰遼陽我得矣何不降嘉一矢斃之賊稍
引退嘉遂開西門逐賊賊大至嘉力戰死贈崇化宣
力效忠功臣封太原郡公諡忠烈

朶爾直班

字惟中木華黎七世孫至正中出爲遼陽行省平章
政事至官詢民疾苦知米薪羊豕諸貨鄉民販負入
城貴室公府皆強買之僅酬半直又其俗編柳爲斗

大小不一猶僧得以高下其手民咸病之卽飭有司厲防禁齊稱量諸物畢集而價自平存恤孤老平準錢法汰胥吏慎勾稽興廢墜明賞罰王邸百司聞風震悚嘗采前賢遺言爲書以進賜名治原通訓藏於宣文閣

也 速

蒙古人至正初拜中書平章政事時賊陷大寧詔也速討之遂拔大寧旣而雷帖木兒不花程思忠等陷永平詔也速出師遂復灤州擒雷帖木兒不花送京師程思忠棄城遁去追至瑞州殺獲萬計賊遂東走

金復詔拜也速遼陽行省左丞相開省永平時金復海蓋賊並起西侵興中州陰由海道趨永平聞也速開省乃轉攻大寧爲守將王聚所敗也速於是分命官屬勞來安輯使民什伍相保以事耕種民爲立石頌之

來阿八赤

寧夏人至元二十一年同僉宣徽院事遼左不寧授征東招討使招徠降附期以自新遠近帖然于寄僧爲水達達屯田總管府達魯花赤乃顏叛戰於高麗雙城調萬安軍達魯花赤

尉遲德誠

字信甫絳州人延祐二年拜遼東道肅政廉訪使上疏言勞諸王以懷其心防出入以嚴宮禁及立諫官崇科舉置常平汰僧道舉賢良抑奢侈拯鈔法元員等事未報而卒

唐仁祖

畏兀人授翰林學士承旨遼陽饑奉旨往賑同事者欲如戶籍口數大小給之仁祖曰昔籍小口今已大矣可皆給以大口之數同事者譏其要名仁祖曰吾知爲國卹民而已卒以大口給之

呂震

字伯起東平人至正中爲懿州路總管後曹寇陷遼省震率郡兵逆戰死之追封東平郡公諡忠憲
答里麻

高昌人累官刑部尚書元統初陞遼陽行省參知政事高麗使過遼陽謁省官各奉布四疋書一幅用征東省印封之里麻詰曰印以署公牘何爲封私書况汝出國時我尚在京未爲遼陽省官何得有書遺我得非詐耶遂還其書與布

李之英

字允達鄒縣人嘗從曹元用授易從吳澄受尚書春秋從陳繹魯受詩禮河圖而就正於虞集泰定三年爲遼左儒學正士庶宗之有門生病而其家皆遠去者之英就視療治尋愈積習頓除

姚樞

字公茂本柳城人後遷居洛陽至元二十年爲遼東按察使武平縣民劉謐訟其嫂與所私同殺其兄成縣尹丁欽以成屍無傷憂懣不食妻韓問之欽語其故妻曰恐頂顙有釘塗其迹耳驗之果然獄定上讞公召欽詢之欽矜妻之能具以告公曰若妻處子耶

曰再醮令有司開其前夫棺毒與成類併正其辜時人比之包孝肅云

太平

字允中賀仁傑之孫勝之子也至正十五年除遼陽行省左丞相糴粟以給京師處置有法輪多而民不擾

也先忽都

名均字公秉太平子至正十九年羣盜由開平東屯遼陽詔均往討至則遣將拔懿州省治盜踰遼河東奔

趙洙

至正間為遼陽儒學提舉十九年紅巾賊陷遼陽洙與妻許氏避資善寺賊至不屈厲聲叱之遂見殺許氏慟哭仆地罵不絕口亦遇害賊退寺僧收其夫婦屍合葬之

胡巨源

榆次人登進士第任高麗軍民總管儒學教授多著述蔚有文稱

明

吳立

鳳陽人洪武四年故元遼陽行省平章劉益降立以斷事官持詔往諭因為遼東指揮遷葢州衛指揮僉事立守葢二十餘年治城郭練甲兵課農興學周恤疾苦夙夜勤勞人多頌之

方嵩 張良佐

嵩為左丞良佐為右丞並隸平章劉益部下益既降復為故元平章洪保所殺嵩與張良佐悉捕其黨送京師乞留斷事吳立鎮撫軍民太祖以立與良佐嵩俱為指揮共守葢州後調東寧衛皆有勞績

馬雲 葉旺

雲合肥人旺六安人洪武四年爲都指揮使由登萊渡海頓兵金州招降元叅將葉廷秀攻走平章高家奴及納哈出進至遼東完城繕兵一方遂安八年納哈出寇遼東雲與旺守禦嚴密元兵知有備徑趨金州時州城未完指揮王富督勵士卒分守諸門射具驍將乃刺吾擒之納哈出由祚河遁葉旺先移兵祚河自連雲島至窟駝寨十餘里沿河疊冰以水淋之徑宿凝結如城藏釘板於沙中設陷馬奔於平地伏兵以待已而元兵至方過城南砲發伏起兩山旌旗蔽空矢石如雨寇倉皇北奔趨連雲島遇冰城馬不能前皆入窞中衆遂大潰馬雲亦於城中出兵追擊至將軍山畢栗河納哈出僅以身免論功雲旺並加都督僉事分鎮遼東

劉江

永樂中鎮守遼東巡視諸島相地形勢請於金州衛之望海塢築城堡立烟墩一日瞭望者報海寇將至江急牽官軍赴塢備之翼日倭艚船數千直逼塢下江令犒師秣馬意態安閒伏兵山下遣壯士潛燒賊船截其歸路乃與衆約日旗舉砲鳴伏兵奮擊不用命者軍法從事既而賊至伏兵盡起兩翼並進賊兵

大敗奔櫻桃園空堡將士請入堡勦殺江合圍而缺其西壁仍分兩翼夾攻擒斬無遺自是倭寇不敢犯遼論功封廣寧伯及廣寧侯

馮時泰

號虞庭山西汾州人任廣寧道兵備叅議守正不阿築大定老軍臺堡數十處區畫有方及邊隅告警主帥失機時泰奉旨勘實有忤當事遂被逮遼民無不稱冤欲詣闕聲枉總督顧養謙止之疏爲時泰申雪宰相趙志臯等亦交章力爭竟不自時泰自嘆曰由來直道忤當權過貶潮陽路八千一掬忠肝天所鑒

幾回血淚灑蠻烟

周鶚

懷遠人以功陞西安衛都指揮僉事後調安遼右衛馬雲葉旺聞其勇致之幕下有攻伐必委任之屢有勞績及卒賜祭其家

徐便

黃岡人嗜學有武畧以精兵從葉旺有功陞海州衛指揮僉事復陞遼東都指揮僉事

曹鳳

臨淮人以功調廣寧中屯衛指揮同知始築城池開

創衛治撫恤士卒仕至都指揮同知

徐玉

德平人由金吾衛千戶歷陞永寧懷遠定遼左衛指揮僉事守禦遼陽每有軍功

裴牙失帖木兒

女直人沉毅有勇畧洪武時授百戶歷戰有功陞千戶後又以功陞三萬衛指揮僉事訓練士馬勞來遠人尋陞指揮同知

韋富

黃岡人以功陞指揮同知調金州衛宣布恩信頗有

勞績

程通

字彥亨績溪人洪武庚午舉鄉試授遵府長史燕工將舉兵通上封事謀備兵入援及正大統械通詣京師殺之後祀表忠祠

施聚

通州人由金吾右衛指揮使以功充本路參將陞都督僉事充右副總兵鎮守遼東累功封懷柔伯

曹義

儀真人襲指揮永樂間召從征著奇績尋平茶陵梅

花洞蠻陞中軍都督僉事鎮守遼東開擴邊疆累功封豐潤伯世襲

巫凱

句容人幼穎異七歲賦牡丹詩十九代父百戶職累功陞遼東都指揮使宣德間陞左軍都督僉事展廣寧城奏設寧遠衛尋陞都督同知

王真

盱眙人由千戶累功陞都指揮使管遼東都司事素著勞績累陞都督同知卒賜祭葬

王祥

固始人以都指揮僉事任廣寧開原操備修築寧遠蒲河等城掌遼東都司事恤下與學頗多善政

鄒溶

盱眙人累陞錦州衛指揮同知調開原備禦修城壘開河道展關廂創馬市俱有能聲

王翺

字九臯鹽山人永樂乙未進士正統七年提督遼東軍務許以便宜行事翺至前屯衛總兵以下庭謁翺詰失機之由將斬之哀請得免於是三軍股慄莫不用命在任九年經畧屯堡簡閱行伍賑貧窮恤鰥寡

寬法律軍民便焉

程信

休寧人壬戌進士歷遼東左參政再陞僉都御史巡撫遼東造戰車儲芻粟稽侵漁察奸細號令一新

劉孜

字顯孜萬安人正統進士授御史按遼景帝卽位有建南遷議者孜馳奏乞斬言者以定人心期滿當代朝議邊務方殷孜能懾服將吏復留一歲

李秉

字執中曹州人正統進士景泰初提督遼東軍務節

用愛民恩威兼濟斥遠烽火識拔將材策力並效邊境以安

馬文升

河南人舉進士巡撫遼東士卒皆鼓掌喧舞蓋文升向者再度遼皆有惠政故東人思之

王崇之

滑縣人天順進士知上海縣擢御史時遼陽數有邊警戰備廢弛士卒饑寒崇之按遼調劑振作切中機宜以不屈汪直謫延安府推官

強珍

滄州人由進士巡按遼東精敏果毅邊境大安權閹
汪直黷貨殺人珍論劾之直反誣珍檻車詔獄御史
許進疏珍寃卒除籍戍鐵嶺直敗復官累遷南京通
政

滕 昭

汝陽人成化初巡撫遼東經畧要害申飭將卒完城
繕兵加意學校廣詢民瘼痛革奸貪還朝之日攀留
遮道無不灑涕

左 鈺

字廷珍阜城人成化時由鄉薦拜監察御史累遷巡

撫遼東豪強斂跡邊鎮教寧

王 銘

錦州衛人父陣亡襲指揮使陞都指揮使成化癸卯
守備寧遠前屯勸衆講武撫練軍民重修二城廟學
甲辰興水縣有警銘率精騎捲甲直趨百餘里遏歸
路盡獲所失人畜數年無犯境者

王 嵩

汲縣人成化間由進士巡按遼東舉行朱文公家禮
喪禁佛事遂至成俗云

李 善

隴州人成化進士巡按遼東時太監韋朗侵漁兵餉
縱手下人奪人妻孥聞善至遂屏息論劾都督王鏊
孫貴罷去豪右歛跡

劉成德

蒲州人辛未進士按遼東時修舉廢墜奏開儒學貢
置雅樂射禮親書聖賢牌位重修學宮政績甚著

李貢

字惟正蕪湖人成化甲戌進士巡撫遼東先是貢分
巡遼有惠政至是不啻望歲總兵毛倫挾劉瑾勢橫
暴多不法貢裁抑之瑾嗾言官誣以他事罰貢米五

百石勒令致仕貢喜曰今日皇甫規得與黨人矣

羅綺

磁州人宣德庚戌進士巡按遼東風紀振肅陞戶
部侍郎又見流寓

劉大謨

儀封人由進士巡按遼東嚴明端正剔蠹除奸時鎮
守太監貪殘無厭因大謨收其左右繩以法乃賂近
侍誣奏大謨逮詔獄遼士民自遼陽抵山海哭留遮
道不絕謫隆德典史尋遷僉都御史巡撫山西政蹟
著聞

許進

字季升靈寶人成化丙辰進士分巡遼東風裁凜然中貴屏息尋擢右僉都御史巡撫大同身係天下安危善類賴之

張貫

蠡縣人成化時進士歷陞按察使以忤劉瑾謫官參議旋起右副都御史巡撫遼東謹烽燧明斥堠兵馬芻粟城隍整堡率有成效璽書褒之卒於官

韓斌

憲宗朝爲遼東協鎮展陽明臺水關嶺諸屯堡復於

清河地方設立城堡置備禦官兵操練防守建鴉鵲關以限內外遼界遂濶

翟敬

猗氏人弘治進士初授翰林檢討屢遷遼陽行太僕寺少卿廉清勤慎歸囊無餘錢惟衣襤而已

韓瑄

高陽人弘治間進士分巡遼東時妖人李真等作亂瑄捕誅之邊境以寧

馬中錫

字天祿故城縣人成化乙未進士武宗時巡撫遼東

召還後朝廷遣使覈遼東芻糧使承劉瑾意謂腐損過多歸咎中錫械繫遼東責償東人聞其至咸願代輸中錫固謝之盡鬻田廬稱貸以完所著有東田文集東田漫稿十四卷行世

張文明

陽曲人辛未進士正德時巡按遼東政尚大體寬恤小民吏畏其威民懷其惠

許達

固始人正德三年進士以樂陵知縣平流賊功超陞山東按察司僉事分巡遼海東寧道禮賢愛民聽獄

詳明尋陞江南按察司副使宸濠之變達不屈死之諡忠烈

王宗彝

束鹿人丙戌進士官戶部郎督理遼東糧儲屯種盡心緯畫勘斛斗慎出納官民兩便府藏充實歷陞都察院僉都御史巡撫遼東官至戶部尚書

王懋中

安福人舉進士累官山東布政司參政分守遼海東寧道練事勤政聽斷明允

許宗魯

咸寧人正德中進士巡撫遼東歸民地之占於軍者
遼人賴之

王舜漁

常熟人由進士歷官山東按察司僉事興利除弊不
遺餘力先時正德間國計告匱遼東軍職俸食不得
時給射利者於中行賂網利舜漁廉得之卽發其奸
遼人頌之

周斯盛

西寧人癸丑進士嘉靖時巡按遼東是年暑雨數月
禾盡湮沒軍民饑甚亟開倉賑給不足復索之庫得
贖金併可貸者萬餘兩訪素有積貯者量子之金俾
出穀平糶猶不足上疏求賑更發帑金全活甚衆土
寇犯廣寧斯盛身先士卒戰六晝夜卒有安定之功

曾 銑

江都人一云浙江黃巖人嘉靖己丑進士巡按遼東
乙未春巡撫都御史呂經北巡至白開原如遼陽行
政過激拂士卒心三月己丑據城叛時銑按部至復
州聞變亟旋四月丙申入城開諭禍福以安之經歸
叛卒門焉銑乃杖數人以徇啟門出是月丙申廣寧
兵變撫順軍亦縛備禦劫其家銑各出檄陽示撫安

陰圖渠魁上狀請以計滅七月甲子銃行射禮文武畢至忽出袖中姓名分令官卒授以意逾時縛八人至明日撫順擒七人陰使人計殺廣寧賊首擒十二人不假兵革三城肅清遼人建祀之後以倡復河套爲嚴嵩所害隆慶間贈兵部尚書諡襄愍

張 鏊

字濟川嘉靖進士生平清苦終始一節任遼東苑馬卿比去遼人爲立生祠

王本固

字子民邢臺人嘉靖甲辰進士以剛直忤嚴嵩嵩每求所以中傷之會遼左饑奉命賑濟給米六萬石以騾車運意謂緩不及事將加以罪本固奏一半折銀濟遼陽遠地一半本色濟廣寧近地凡再閱月而完遼左安焉

趙孔昭

字子潛邢臺人嘉靖甲辰進士爲監察御史出按遼東時遼將李錡不法倚仇鸞恣橫人莫敢言孔昭毅然劾之

馮 顛

高平人嘉靖丙午舉人任遼陽僉事清操卓行世所

罕見凡歷數任止攜一僕而已

梁夢龍

字乾吉真定人嘉靖癸丑進士萬曆五年總制薊遼首除鎮軍疾苦簡軍實修馬政築城壘謹烽堠慎擇將領以功廕子錦衣衛千戶

傅霖

忻州人嘉靖壬戌進士任遼海兵備道二年績載明史

魏學會

涇陽人嘉靖進士巡撫遼東先有叛卒黃勇不能得

學會以計擒之邊境遂安

張學顏

字子愚肥鄉人嘉靖時進士撫遼八年陳戰守機宜十策後父母喪皆廬墓有白雀來巢之異

楊行中

字惟慎通州人嘉靖時進士選授御史按遼東巡撫呂經激遼陽兵變兵部請勦行中疏請榜示諸城令亂者自相捕以贖罪上嘉納之事得寢

翟律裳

聞溪人嘉靖進士任兵部主事條陳邊計多見舉行

陞遼海東寧道有撫順守備以白金貂皮行賄卽揭正其罪墨吏震悚

李松

大成人嘉靖時進士官至寧前道威惠並施歷十二載晉秩至右都御史撫遼三年軍民悅戴

麻貴

大同右衛人萬曆二十五年任備倭總兵數戰有功進右都督予世廕三十八年鎮遼東明年沿邊有蒙古以三萬騎入掠穆家堡貴禦之敗去夏貴引病乞罷詔乘傳歸貴果毅驍捷善用兵一時稱為良將

李植

字汝培大同人萬曆五年進士二十六年巡撫遼東墾土積粟得四萬畝歲獲糧萬石戶部推其法於九

邊

宋應昌

號桐岡仁和人嘉靖乙丑進士萬曆壬辰日本關白舉三十六島之衆突入朝鮮國王李昫走竄義州八道三韓殘破幾盡聲言內犯京師戒嚴詔拜應昌兵部右侍郎經畧薊遼等處防海禦倭時經畧創設提督大將軍李如松尚羈寧夏兵食皆缺詔書督促部

署出關應昌卽誓衆蹈水渡江明年春正月兵薄平壤門其三門外布蒺藜火器齊發毒烟蔽空官軍攀附而上倭將平行長遁回王京應昌知王京城南有龍山倉朝鮮糧儲所在夜令死士以火箭燒之倭兵食無資乃棄王京遁去連追敗之朝鮮遂寧

萬世德

字伯修偏關人隆慶辛未進士才智膽畧伯仲晉溪威寧時倭犯朝鮮世德以邊才進職巡撫都察院御史經理朝鮮遂集將士謀大舉命董一元等統精兵直逼釜山大有斬獲焚倭船七百餘隻召回朝鮮難民五千六百餘口捷聞特命總督薊遼尋遷右都御史兼兵部右侍郎總督如故世德在薊遼惟以息事寧人爲務寬大簡靜以疾卒於官

李化龍

字于田長垣人萬曆進士鎮遼有功陞兵部尚書請撤稅監高淮遼人德之卒謚襄毅專祠致祭

劉英

蘇州崇明人性孝友簡靜寡言不事矯飾由廣寧指揮使累功陞都指揮使管遼東都司事歷任旣久廉能益著後以年老休致遼人攀轅留之

汪 直

知錦州時歲旱捐俸賑救隨濬水源創石磬七堰溉田數千頃

劉 斌

蘇州崇明人以都指揮僉事備禦寧遠築城建衛政理民安卓有能聲

王 樸

沁州人歲貢孝友持躬著書立節官遼東都司教授士人化之

帥 心

字於仁安肅人萬曆時領鄉薦授遼東通判明敏果

決

本朝

張尚賢

遼東人順治十一年知遼陽府時地方新設民多招徠尚賢拊循有道一二年間遂致殷庶後陞府尹凡新設州縣皆遵教令戶口日增去任後遼陽人建祠於州西甕城內歲時祭之

安珠瑚

滿洲人骨鯁簡重得大臣體康熙十七年任奉天將

軍繕城郭興屯田招徠遠人興利除弊皆有成效至今旗民追念其德感佩不已

劉文亮

漢軍鑲黃旗人順治十五年襲父承義佐領仍駐錦州招民十八年錦州設府州縣康熙元年以孔允檜知錦州事縣民以文亮父子蒞茲土并有惠澤不忍他屬凡訴訟諸事猶奔控於文亮曰非劉青天不能決京兆尹徐繼焯以聞奉

旨以劉文亮帶佐領兼知錦縣而調孔允檜於開原文亮招民入籍皆爲之度邑居給牛種課勤惰而勸相之

時縣境多旗莊圈占地文亮立民圈印冊正其畛界預杜侵奪故無兼併之患及戶口日增又創設義學擇民童之秀者延師教之邑之文風自此始振有上駟苑總管緝拿逃盜誤將沿邊一帶居民拘繫入關文亮兼程追至永平據理直爭各按印冊認回仍爲良民至今父老猶能說其事

范時崇

忠貞公承謨子也康熙二十三年任遼陽州知州寬簡愛民凡徵收錢糧並無火耗時議撥民屯田民多遷徙時崇以本境地屯種有餘請不他徙以故遼陽

州民得安生業陞福建按察累陞浙閩總督有惠政
聞人思之從祀道山忠貞公祠中又劉貞胡祚遠陳
學海先後任遼陽州俱有德政百姓奉牌祀本州城
隍廟

王國安

蓋平人康熙二十八年任奉天府尹廉靜不擾三十
七年再任晉兵部左侍郎卒入名宦祠先是國安撫
浙省整飭漕務清理權稅革陋規建隄閘具有條制
杭城兵民雜處營債素爲重累國安捐金代償焚券
息爭浙人德之亦祠名宦

梁世勳

見陝西人物志

字廷庸三原人以蔭從靖逆侯張勇勦寇有功康熙
二十六年除奉天治中時有防禦兵借住民房之議
世勳視屋大小均給之又編爲保伍調置有法民賴
以安

徐廷璽

漢軍人康熙三十四年任奉天府丞次年陞府尹有
幹濟才抑奸暴扶善良振興禮讓旗民大和至今稱
良吏者猶不忘徐府尹云

呂履恒

號坦庵河南新安人進士康熙五十年任奉天府府丞奉天兩府科歲考例以府丞代其事履恒簡拔寒素接引後學者道論文無倦意一時士子鼓舞奮興文風大振刻有留都文萃內多觀風月課賞識之作至今傳誦不衰

